

Kerajaan Peruntuk RM17.49 Juta Laksana 219 Projek Kecil Transformasi Luar Bandar Di Kelantan
Bernama
24 Oktober, 2012

KOTA BAHARU, 24 Okt (Bernama) -- Kerajaan pusat memperuntukkan kira-kira RM17.49 juta bagi melaksanakan 219 projek kecil transformasi luar bandar di seluruh Kelantan pada tahun ini.

Pengarah Jabatan Pembangunan Persekutuan Negeri Kelantan Datuk Makhtar Mustafa berkata daripada jumlah tersebut, sebanyak RM5.71 juta diperuntukkan kepada Kementerian Kemajuan Luar Bandar dan Wilayah bagi melaksanakan 40 projek seperti membina dewan dan balai raya, jambatan kecil, jalan perhubungan desa dan gelanggang futsal.

Jabatan Kesihatan Negeri Kelantan diperuntukkan RM5.46 juta bagi melaksanakan 22 projek seperti menaik taraf klinik kesihatan dan klinik desa manakala Jabatan Pelajaran Negeri Kelantan diperuntukkan RM3.32 juta bagi melaksanakan 56 projek termasuk membina surau, mengganti surau sedia ada dan menaik taraf surau sekolah.

Jabatan Pengairan dan Saliran Negeri Kelantan diperuntukkan RM3 juta bagi melaksanakan 101 projek seperti menaik taraf saliran dan parit, katanya kepada pemberita selepas mempengerusikan Mesyuarat Jawatankuasa Kerja Tindakan Persekutuan Negeri Kelantan di sini, Rabu.

Makhtar berkata sebanyak 152 daripada 219 projek tersebut sudah siap manakala baki 67 projek lagi dijangka siap sebelum akhir tahun ini.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=704588>